

Nos HENDERMAN Special

Pa: Mercedes Abdul

Eduardo de Veer ta conta:

META CORPORATION HAMAS A PERDE FE CU ARUBA LO RECUPERA FOR DI E CRISIS

Awe DIARIO ta finaliza su entrevista cu señor Eduardo de Veer, como invitado den "Nos Hendenan Special". No por papia di Eduardo de Veer los di Meta Corporation, cual su welo a funda 76 aña pasa.

Un resumen di e prome fase di e historia amplio di Meta conta pa señor de Veer, a worde publica diamars siman pasa. Sonesta Hotel, y e proyectonan cu a sigui despues ta loke nos ta trece padilanti awe.

De Veer ta menciona cu prome cu ciere di Lago, famia de Veer a converti parti di loke tabata Restaurant Trocadero, situa den e edificio di Teatro De Veer, den un centro comercial chiquito apesar cu e trafico di consumidor tabata estrictamente den Nassaustraat e tempo ey.

"Apesar cu nos inverti den un area poco trafica pa publico consumidor nos a sigui expande cu fe y confianza, logrando asina di crea e masa critico suficiente pa hala e atencion di e cumpradornan. Asina a sigui expande un poco mas te yega na loke nos tur conoce awendia" de Veer ta comenta.


ORIGEN DI HOTEL SONESTA: Na aña 1986 ora Aruba a haya su Status Aparte e pais tabata sufrí di e consecuenecianan di ciere di Lago, loke a pone e pueblo en general confronta un situacion caotico. Desempleo a yega na 40%, problemaman di divisas y falta di liquidez financiero di gobierno a obliga hopi Arubano abandona nan pais pa bay biba na otro lugar en busca di un mehor futuro.

"Nos a mira economia di Aruba y esun di nos propio empresa ta bin abao", de Veer ta corda.

Sin embargo na momento cu gobierno a acerca Meta pa desaroja un proyecto di hotel nan a bay di acuerdo, y como simbolo di speranza y fe den e progreso di e pais, Hotel Sonesta a nace for di un pensamiento creativo.

"Hotel Sonesta a worde traha cu garantia di gobierno inicialmente, cual despues di algun aña nos a devolve tambe, ora nos a refinancia e proyecto.

Nos a haya financiamiento na diferente lugar, pero eventualmente nos a usa financiamiento di exportacion di Venezuela conhuntamente cu credito di banconan local".



Sonesta Hotel a worde traha cu 300 camber y bao di dje a expande e centro comercial.

"Caminda cu tabata tin e dos cinenan nos a pone Crystal Casino, y unda cu antes tabata Gatsby's Restaurant cu despues e a bira Papagayo Restaurant nos a bin cu L'Escale y Crystal Lounge y asina nos a desaroja loke awendia nos pueblo ta conoce como Sonesta Hotel y su shopping center bao di dje".

CONFIANZA DI SECTOR BANCARIO: E proyecto hotelero aki a cuminsa na 1986, y e ta encera aspectonan financiero importante. Un proyecto grandi y ambicioso cu mester a bira realidad den tempo di crisis, unda cu inversionistanan potencial no tabata masha dispuesto pa hinca capitalnan grandi den e desarojo di Aruba.

"Meta Corporation a keda demostra su fe den e futuro di Aruba agotando tur su esfuernan pa convence entidadnan financiero, bancario y gubernamental pa haci inversion apesar di e situacion financiero dudoso di e tempo ey".

E proyecto a cuminsa cu un presupuesto di 20 milyon dolar, di cual e Fondo di Financiamiento di Banco Central Venezolano (FINEXPO) a sostene cu 8.5 milyon dolar.

Gobierno Arubano a duna garantia di 18 milyon dolar, ABN-Bank y Interbank a financia cu 10 milyon dolar.

"Na dado momento e presu-

puesto a sobrepasa di 20 milyon dolar te yega na 30 milyon. E resto di placa a worde financia pa Meta mes y pa medio di creditonan a corto plazo cerca banconan local".

Na cumintamento di 1991 meta Corporation a worde refinancia pa 25 milyon dolar pa Nationale Investeringsbank N.A pa e compleho total di Seaport Village.

MAS EXPANSION: Turismo a crece y e necesidad di expande Sonesta Hotel cu mas camber tambe. Pero no tabata tin espacio pa amplia e edificio. E ora ey Meta Corporation a acerca e operadornan di "Harbour Town" cu intencion di compra e unidatnan di time sharing cu no tabata bendi ainda.

"E compania tabata bayendo fallit y eventualmente nos a drenta den negociacion cu esnan concerni y cu asistencia di N.I.B nos por a cumpre, bao condicion cu nos tabata garantiza e doñonan di time sharing pa keda cu nan unidat; cu nos lo paga e debenan local; y cu di 90 pa 95% di nan empleadonan lo a keda mantene nan trabao y tur nan derechonan".

MAS PROYECTO: Drechamento di Wilhelminapark cual a consumi un suma di mas di 1 milyon florin pa embeyecimento; drechamento di e area di shopping y di e casino; remodelacion di time sharing, awe yama Sonesta Suits; creacion di e facilidad di Seaport Theater, y construcion di Seaport Conference Center ta

proyectonan cu a bin acera y cu a mehora gradualmente e area di Seaport Village.

"Mey mey di aña pasa nos a dicidi cu nos no ta bende time sharing mas pasobra nos kier keda cu e unidatnan cu no ta bendi, relaciona cu e construcion di e Conference Center cual a trece cune un necesidad adicional di camber di hotel".

CENTRO DI CONFERENCIA: Cu un grandura di 44 mil pia cuadra, Seaport Conference Center a costa e compania Meta Corporation mas of menos 10 milyon dolar. E idea di su construcion a nace sigur for di un necesidad.

"E construcion a tumar un aña di tempo, y nos ta contento cune. E ta sirbi un necesidad local y pa nos turismo, no solamente pa Sonesta Hotel pero pa nos industria turistico completo".

UN NUBIA SCUR: E luz di e ceremonia di apertura di Centro di Conferencia cu mester a cuadra cu e 75 aniversario di Meta Corporation (1995) a worde paga pa un nubia scur tempo cu sin motibo algun famia de Veer a worde envolvi den e Caso Be.a.

"E apertura di e Centro di Conferencia mester a cuadra cu celebracion di 75 aña di existencia di Meta Corporation. Nos intencion tabata pa haci un evento importante cu lo a conmemora e 75 añanan di e compania y a alavez como apertura di e centro. Pero nos a worde

hinca den un asunto sumamente penoso cu ta e Caso Beta.

Nos a worde lastra den dje na un forma incomprendible pa nos te awe, pasobra nos no tabata tin absolutamente nada di haber cune. Hecho ta cu dos Huez di prome instancia a bay di acuerdo cu nos no tin nada di haber cu esey. Despues Ministerio Publico a bolbe bay den apelacion y hunto cu otro acusadonan nos tambe a bay como acusado. Eynan 3 Huez a bay di acuerdo cu nos no tin nada di haber cu henter e asunto ey.

Pero e nubia scur cu a worde crea den e temponan ey a pone cu nos no a haci ningun pronunciacion di nos 75 aniversario ni a haci apertura oficial di e centro di conferencia, pero djis cuminsa run e lugar so".

COMO DUNADOR DI TRABAO: Meta Corporation ta un compania stabil cu ta conta cu 1200 emplead' y e ta un di e empresanan cu mas seguridad di trabao ta ofrece su trahadornan, y e.o. e ta inverti constantemente den recapitacion di su recursonan humano. "Meta Care Center" ta un di e beneficiadnan mas reciente cu e compania a crea pa cuidu di yunan di trahador; y si no ta esun promer ta un di e prome companianan cu a tumar den servicio un trahador social, pa asina tene cuenta cu problemanan di e personal tanto paden cu pafo di e compania, ya cu e trahador como ser humano ta central pa e compania.

RIBA INDOLE PERSONAL: Don Eduardo de Veer ta casa cu Ellen Roos, di cual matrimonio tin tres yiu: Annie, kende ta casa y biba na Puerto Rico; Eddy, tambe ta casa y tin dos yiu muher, y ta biba y traha na Aruba; Richard kende ta traha y biba na Miami. Don Eduardo su nietonan ta yama Jessica y Devin.

"Mi pasatempo?". Cu un sonrisa amplio e ta contesta cu su pasatempo ta su trabao mes. "Mi ta disfruta di mi trabao, cu ta uno creativo y unda cu continuamente nos ta trahando di modernizá y mehora awe loke nos a haci ayera".

Ora cu algo di tempo resta, e ta core bicicleta, hunga tennis, of bay landa, y ora cu e por "bay keiro".